



*Mientras cu inscripcion Sasha di Tsunami pa Tumba a
causa furor na Corsou*

Rey di Tumba di Aruba no ta defende su titulo e aña aki

ORANJESTAD – E Rey di Tumba 2012 di Aruba Chandell Beaumont no ta defende su titulo e aña aki. E decision doloroso a cay diasabra ultimo pa e banda Rincon Boys. E motibo principal ta financiero, y falta di tempo pa por logra haya e refuerso necesario pa e banda por presta manera cu ta. Placa sigur ta un problema pero e falta di e talento, sigur tambe ta pisa hopi. Ni si nan logra haya sponsor grandi aworaki pa logra financia e participacion, e problema ta keda e falta di integranenan.

Di otro banda, Beaumont a confirma su participacion pa e Festival di Tumba na Corsou, pasobra eynan si nada no ta strob'e di participa. E no ta participa cu Rincon Boys pero cu un banda di Corsou mes. Y esey ta facilita su participacion mas ainda.

E noticia aki a cay manera un baño di awa friu, mirando cu e festival tabata conta riba participacion di e Rey di Tumba y e banda Rincon Boys, como un di e fuertenan. Cu e falta di nan den e festival, sigur esaki ta bira un sla basta grandi pa e festival, segun hopi tabata comenta ayera.

Mientrastanto e cantante principal di e banda Tsunami, Sasha Figueroa, a confirma su participacion na e Festival di Tumba di Corsou den fin di siman cu a pasa. Cu henter un fanfaria, e la drenta Festival Center diadomingo pa asina anuncia su participacion cu e banda Era Autentico. Esunnan cu a scucha e tumba di Sasha, a keda sorprende positivamente y a mustra cu e ta algo serio pa tene cuenta cun'e na Corsou. □



Rey di Tumba 2012 Chendell Beaumont cu e aña aki lo no t'ey pa defende su titulo.